

DOMINGU X TEMPU KOMÚN – TINAN A

Maromak nia Liafuan iha Domingu X Tempu Komún repete, ho insisténsia ruma katak Maromak prefere mizerikórdia liufali sakrifísiu. Espresaun ne'e tenke komprende iha sentidu katak, ba Maromak, esensiál la'ós hahalok esternu sira kultu nian ka deklarasaun sira intensaun di'ak nian, maibé atitude ida adezaun loos nian no koerente ba ninia bolun, ba ninia proposta salvasaun nian. Ida-ne'e mak tema liturjia loron ne'e nian.

Iha *leitura dahuluk*, profeta Oseias tau iha kauza comunidade nia sinseridade ne'ebé hakarak kontrola no manipula Maromak, maibé la iha interese loloos atu adere, ho fuan sinseru no loos, ba aliansa. Hahalok esternu sira kultu nian – maski riku no boboot – la signifika buat ida, se la iha domin (domin ba Maromak, domin ba maluk – nu'udar sorin seluk domin nian ba Maromak.

Iha *leitura daruak*, Paulo apresenta ba sarani sira (sira ne'ebé mai husi judaizmu no sira ne'ebé mai husi paganizmu) buat esensiál ida mesak: fiar. Figura Abraão nian mak ezemplár: buat ne'ebé halo nia sai modelu ida mai ita hotu la'ós obra sira ne'ebé nia halo, maibé ninia adezaun totál, inkondisionál no tomak ba Maromak no Ninia projetu sira.

Evanjellu apresenta mai ita katekeze ida kona-ba resposta ne'ebé ita tenke fó ba Maromak ne'ebé bolu ema hotu, laho exesaun. Mateus nia ezemplu sujere katak buat ne'ebé desizivu, husi Maromak nia pontudevista, mak resposta pronta ba ninia konvite atu integra iha comunidade “Reinu” nian.

LEITURA I – Os 6,3-6

Oseias ezerse ninia ministériu profétiku iha reinu Norte (Israel), hahú husi tinan 750 mK., iha época ida ne'ebé ladún hakmatek.

Iha termu polítiku, ne'e mak faze ida marka ho violénsia, ho inseguransa no fakar raan. Ukun sira badak de'it no remata ho revolusaun, oho, masakre sira... Husi sorin seluk, dijente sira-nia aventureirizmu no jogu sira aliansa nian ho poténsia sira época nian hamosu instabilidade no anunsia dezastre nasional no lakon independénsia (buat ne'ebé akontese ikus, iha 721 mK., bainhira Salamanasar V (liurai Assíria nian) harahun Samaria.

Iha termu relijiozu sira, ne'e mak época ida konfuzau boot nian... Nakloke ba influénsia kulturál no relijioza husi povu viziñu sira ne'ebé hale'u nia, Israel aseita maromak estranjeiru oioin hamutuk ho Jahwéh, iha Povu nia fuan no iha sentru relijiozu sira. Sira kahur Jahwizmu ho kultu sira Baal no Astarte nian; maski Jahwéh kontinua sai ofisialmente Maromak nasional, iha nivel populár, sira abandona Nia hodi tuir maromak kananeu sira-nian. Husi sorin seluk, aliansa política sira ho povu estranjeiru sira signifika katak Israel la konfia ona iha Maromak no prefere tau nia konfiansa no esperansa iha funu-na'in sira, iha kuda sira, iha kareta sira funu nian husi super poténsia sira; halo nune'e, Assíria no Ejitu la'ós ona realidade rai nian no realidade umana, hodi nakfilak – iha Israelita sira-nia matan – ba maromak foun sira, ho kbiit atu salva. Povu envezde konfia Jahwéh, konfia fali sira.

Oseias sente profundamente drama sinkretizmu religiozu nian ne'ebé tau iha perigu nia Povu nia fiar. Ninia mensajen apela atu Israel keta husik idolatria (adora maromak falsu) ne'ebé Oseias hanaran “prostituissau” domina sira: Povu mak “feen” ida ne'ebé husik “laen” atu halo tuir “amante” ka doben seluk. Profeta konvida nia Povu atu deskobre hikak fali Jahwéh nia domin – prezente nafatin iha Israel nia istória – no atu hatán ba Nia ho vontade sinsera atu moris iha komuñau ho Nia.

MENSAJEN

Iha inísiu kapitulu 6, profeta tau iha Povu niaibun fórmula ida arrependimentu nian ka peniténsia nian, karik foti husi tradisaun kulturál (“mai, ita filafali ba Na'i: Nia harahun ita, Nia sei kura ita; Nia halo kanek, Nia sei taka ho ligadura ne'ebé kura” – Os 6,1). Maski nune'e, profeta hateke ba espresaun ida-ne'e ho matan iróniku... Tanba sá? Povu nia konversaun la'ós sinsera? Husi Povu nia parte iha duni hakaran tebes atu filafali ba Maromak no husik defintivamente idolatria?

Ba kestaun ida-ne'e mak Oseias refere iha testu ne'ebé ohin propoin mai ita... Profeta parese iha dúvida ho sinseridade Povu nia “konversaun” nian. Buat ne'ebé Israel dehan mak: “Na'i hanesan rai-hun mutin, pontuál, evita-laek, hanesan udan ne'ebé habokon rai. Ita hatene ona oinsá Nia funsiona, basá bele prevé perfectamente Nia; se ita hatene didi'ak sasán sira, ita bele kontrola Nia, no tau Nia iha ita-nia sorin no rekupera moris ne'ebé ita lakon” (kf vers. 3). Ida-ne'e atitude kalkulista husi ema sira ne'ebé hanoin katak sira hatene didi'ak Maromak no hakarak maneja Nia no manipula Nia, duké rezultadu husi atitude koerente no sinsera, husi dezeju loos “konversaun” nian.

Ba buat ne'e, oinsá Maromak reaje? Profeta deskreve nu'udar luta interiór ida... “Ha'u sei halo sá loos?” – Maromak husu... Maibé resposta mai tuir kedas: hodi repete imajen sira Povu uza, Maromak asume katak nia sei la rende, basá Israel nia “konversaun” ne'e superfisiál de'it, hanesan maho-been ne'ebé tun iha dadeer no lakon kedas (kf vs 4). Israel la dispostu atu muda fuan, nia dispostu de'it atu “kontrola” Maromak atu hetan fali moris... Ne'e duni, se la iha transformasaun loloos fuan nian, Povu ne'ebé haklaken katak hadomi Maromak mak deklarasaun intensaun di'ak de'it, ibun tutun de'it.

Oinsá mak Israel manifesta iha nia loran ba loran ninia vontade atu “fila fali ba Na'i”? Liuhusi moris koerente ho ukun-fuan sira? Liuhusi domin ne'ebé mai husi fuan no espresa iha jestu konkretu laran-di'ak nian, justisa nian, mizerikórdia nian? Lae. Israel nia “domin” ba Jahwéh espresa liuhusi ritu esternu de'it, hahalok sira kultu nian... Ritu sira ne'e (sakrifisiu) la signifika buat ida; sira mak hahalok husi li'ur ema nian, esteriór... La folin buat ida, kultu ida, maski boboot, la mai husi atitude interiór domin nian no vontade komuñau nian ho Maromak (“koñesimentu Maromak nian”). Kultu labele sai konjuntu ida ritu sira-nian ne'ebé la liga ho moris, ho intensaun atu hatun Maromak nia hirus ka atu sosa Maromak nia laran-di'ak; maibé tenke sai espresaun moris ida ne'ebé fila ba Maromak, moris iha ritmu aliansa nian, iha respeitu ba Maromak no ba Ninia proposta sira.

Hateten katak Maromak hakarak “mizerikórdia” (“hesed”) no la'ós sakrifisiu, koñesimentu Maromak nian (“daat Elohim”), liufali buat karan (kf vers. 6), tama iha lójika ida-ne'e... Signifika katak Maromak la iha interese ho ritu esternu sira – maski riku no boboot – ne'ebé la'ós espresaun sentimentu sira ne'ebé ba to'o fuan; buat ne'ebé Maromak hakarak mak fuan ne'ebé aseita tebes duni ati moris iha komuñau ho Nia (koñesimentu Maromak nian) no hatene

halo jestu konkretu domin nian, ternura nian, laran-di'ak nian, mizerikórsia nian (“hesed”) ba maluk sira.

LEITURA II – Rom 4,18-25

Bainhira Paulo hakerek ba romanu sira, nia preokupadu hela ho ameara divizaun iha Kreda: sarani sira mai husi judaísmu no sarani sira mai husi paganizmu iha perspetiva diferente kona-ba salvasaun no parese xoke malu. Krize sira mosu iha Corinto no Galácia konvense Paulo kona-ba situasaun nia gravidade.

Problema ne'e iha mós iha Roma? Iha Roma, ita tinan 49, éditu ida husi imperadór Cláudio obriga judeu sira atu husik Roma; comunidade sarani entrega tomak ba sarani sira husi orijen paganizmu nian... Maibé iha 57/58, judeu barak filafali ba Roma no comunidade sarani iha número signifikativu judeu-kristaun. Sira bainhira fila, hetan karakterístika diferente husi ida molok sira husik, no comunidade sarani diriji husi kristaun sira konverte husi paganizmu husik tradisaun judaika sira. Ida-ne'e provoca instabilidade ruma iha comunidade.

Paulo, hodi diriji ba Kreda enjerál, nia buka subliña buat ne'ebé tenke unifika sarani sira – judeu, gregu ka romanu. Ba Paulo, apezárde universalidade salan nian (hotu-hotu maksalak, judeu ka lae), Maromak oferese ba hotu-hotu, ho forma gratuita, salvasaun hanesan no ba hotu, iha igualdade sirkunstánsia sira-nian, sai Maromak nia oan sira. Husi Kristu mak Maromak oferese salvasaun ba ema hotu. Kumpri Lei la salva, maibé salvasaun mak don ida husi Maromak. Ba ema, importante mak aseita don fiar ne'e iha fiar, katak hodi adere ba proposta salvasaun.

Nu'udar ezemplu, Paulo apresenta figura Abraão nian (kf Rom 4,1-12). Apóstolu Paulo hatudu katak figura-modelu ba judeu no jentiu sira, la hetan salvasaun husi Lei ka husi obra sira, maibé husi fiar. Ne'e mak kontestu ka ambiente testu ne'ebé ohin propoin mai ita.

MENSAJEN

Paulo husik klaru – ho argumentasaun foti husi Eskritura duni – tanba sá mak Abraão sai depositáriu “promesa” nian no sai hun bensan nian ba ninia dexendénsia.

Tuir Paulo, Abraão sai referénsia fundamentál ba fiar-na'in hotu la'ós tanba nia halo obra sira ne'ebé halo nia merese ka tanba kumpri didi'ak Lei; maibé Abraão sai modelu ida ba ema hotu tanba nia mak “ema fiar nian” (katak, hatene simu Maromak nia don no hatene hatán ba Nia ho entrega inkondisionál, ho obediénsia radikál, ho konfiansa laho limite).

Iha testu ohin, Paulo deskreve Abraão nia fiar nia grandeza no profundidade. Ezemplu ne'ebé nia foti mak ida koñesidu liu no emblemátiku liu: apezárde Abraão no Sara, nia kaben, otas idozu/a ona, patriarka ne'e la namlele, la argumenta, la duvida, bainhira Maromak anunsia Isaac nia moris.. Faktu ne'e hatudu oinsá mane ne'e nia fiar nia aas, nia kle'an, nia kbiit, nia eroisidade, mane ida ne'ebé entrega nia moris kompletamente iha Maromak nia liman, ne'ebé konfia inkondisionalmente iha Maromak, ne'ebé hein hodi “bá kontra esperansa hotu” (vers. 18). Liafuan ikus sira-ne'e mak espresaun bíblika ida uza atu define ema ida nia atitude bainhira rekoñese katak buat hotu nia deve ba Maromak no entrega an laho kondisaun ida iha Maromak nia liman sira.

Ba Paulo, nia la iha dúvida ida: la'ós Abraão nia obra sira, maibé ninia fiar (entrega, obediénsia, konfiansa) mak halo nia sai “eleitu” Maromak nian no sai moris no bensan ba ninia dexendente sira.

Konkluzau: la'ós obra sira ne'ebé ita halo mak aseguira salvasaun; maibé buat ne'ebé aseguira moris nakonu no definitva mak ita-nia fiar – katak, adezaun radikál, konfiante, ilimitada ba oferta salvasaun ne'ebé, iha Jezús, Maromak halo mai ita. Salvasaun la'ós ema nia konkista, maibé Maromak nia don, oferese gratuitamente tan domin, no ema simu konvite atu aseita ho fiar, ho hakmatek, ho konfiansa.

EVANJELLU – Mt 9,9-13

Ita-nia testu halo parte sesaun naruk ida, iha-ne'ebé Mateus hatudu Jezús haklaken “Reinu, ho ninia liafuan no hahalok sira. Sesaun ne'e husi Mt 4,23 to'o 9,35.

Iha parte dahuluk sesaun nian (kf Mt 5-7), Mateus apresenta “sermaun foho nian”: diskursu magnífiku ida, Jezús apresenta “lei” no program “Reinu” ne'ebé Nia mai propoin: anúnsiu “Reinu” nian ho liafuan sira.

Iha sesaun daruak (kf Mt 8-9), Mateus apresenta anúnsiu “Reinu” nian liuhusi Jezús nia asaun sira. Autór koloka iha ita-nia oin grupu tolu asaun ka “milagre sira” Jezús nian ne'ebé halo sai presente realidade “Reinu” nian (kf Mt 8,1-15; 8,23-9,8; 9,18-31); entre grupu sira-ne'e nia leet mosu reflesaun sira kona-ba Jezús nia “jestu” nia signifíkadu sira no apelu atu tuir Nia... Ita-nia testu (kf Mt 9,9-13) halo parte eskema ida-ne'e: apelu ida atu tuir Jezús.

Testu ne'ebé propoin mai ita apresenta epizódiu rua lahanesan. Dahuluk, ita iha publikanu Mateus nia bolun (vers. 9); daruak, ita iha deskrisaun kona-ba festa han-hemu iha Mateus nia uma no kontrovérsia ida ho farizeu sira (kf vers. 10-13).

Publikanu sira ema kataloga sira nu'udar sala-na'in públiku, katak ema hotu hatene. Sira mak kobradór impostu nian ne'ebé, aleinde servisu ba opresór romanu sira, sira mós iha fama atu esplora ema kiak sira. Linguajen ofisiál asosia ka liga sira ho na'ok-teen sira, pagaun sira, ohona'in sira, prostituta sira. Publikanu sira mak ema sala-na'in públiku, permanentemente moris iha impureza no sira labele halo peniténsia, basá lahatene rekoñese ema sira hotu ne'ebé sira na'ok. Farizeu sira, ne'ebé preokupa liu ho sira-nia santidade, bainhira haree publikanu ida iha sira-nia dalan, sira muda diresaun kedas. Ne'e duni, sira mak ema sira la tama iha klase ida (maski riku) foer, konsidera simu malisan husi Maromak no dook husi salvasaun.

Buat ne'e hotu halo ita komprende oinsá ema sira hakfodak ho situaun ne'ebé Jezús hamosu: Nia la'ós bolu de'it publikanu ida ba nia grupu dixípulu sira-nian, maibé mós aseita atu tur iha meza ho nia (estabelese lasu sira familiaridade nian, fraternidade nian, komuñau nian). Jezús nia komportamentu, la'ós de'it atentadu ida morál no kostume di'ak sira-nian, maibé mós provokasaun ida.

MENSAJEN

Relatu vokasaun Mateus nian (vers. 9) la diferente substansialmente husi dixípulu sira seluk nia bolun (kf Mt 4,18-22): iha relatu sira ko'alia kona-ba mane sira ne'ebé serbisu hela, Jezús bolu sira no sira husik buat hotu no tuir Jezús. Sira ne'ebé simu bolun la'ós “superman”, la'ós perfeitu no santu, oinseluk husi mundu, namlele iha kalohan, lahó kontaktu ho moris no ho problema no drama sira mane no fetu sira seluk nian; sira ema normál, halo vida normál,

serbisu, luta, hamnasa, tanis... Maski nune'e, sira simu bolun atu tuir Jezús. Verbu "akolouthêô" uza iha-ne'e iha forma imperativa, tradús asaun "la'ô tuir husi kotuk" no define atitude dixípulu ida ne'ebé aseita atu liga nia an ba "mestre" ida, rona ninia lisaun sira no imita ninia ezemplu sira moris nian... Ne'e duni, ida-ne'e mak Jezús husu ba Mateus. Mateus, lahó objesaun no lahó pedidu esklaresimentu nian, husik buat hotu no aseita sai dixípulu, iha adezaun tomak, totál no radikál ba Jezús no ba ninia proposta sira moris nian. Iha ne'e, Mateus define dalan dixípulu loos nian: nia mak ida-ne'ebé, iha nia vida normál, hasoru Jezús, rona nina konvite, aseita lahó diskusaun no tuir Jezús ho forma inkondisionál. Adezaun ba Maromak nia bolun ida-ne'e hanaran "fiar".

Maski nune'e, iha relatu Mateus nia vokasaun nian, ita hetan buat foun relasiona ho relatu vokasaun sira seluk nian: iha-ne'e ida-ne'ebé simu bolun mak kobradór impostu nian. Ita hatene ona katak kobradór impostu sira-nian mak ema marjinalizadu, esklui husi vida sosiál no relijioza Maromak nia Povu nian, kataloga nu'udar ema sala-na'in, no lahó possibilidade salvasaun nian no relasaun nian ho Maromak. Jezús fali, hakarak hatudu katak, iha uma "Reinu" nian, iha fatin ba ema hotu, maski mundu konsidera sira la klasifikadu, la serve ka marjinál. Maromak iha proposta salvasaun ida atu apresenta ba ema hotu, lahó exesaun; no proposta ne'e la distinge entre ema di'ak no ema aat: ne'e mak proposta ida destina ba ema hotu ne'ebé iha interese atu simu nia.

Iha parte daruak ita-nia testu nian (vers. 10-13), ita iha kontrovérsia ida entre Jezús no farizeu sira, basá Jezús – konvida tiha publikanu Mateus atu integra iha ninia grupu dixípulu sira-nian (buat foun ida, ne'ebé "mestre" ida époka nian la aseita) – nia "hatun an liután" no aseita atu tur iha meza ho publikanu no ema sala-na'in sira.

Festa "han-hemu" ba mentalidade judaika, mak fatin enkontru nian, fraternidade nian, iha-ne'ebé konviva sira estabelese tali familia no komuñau nian. Tur iha meza ho ema ruma signifika estabelese lasu profundu, íntimu, familiár, ho ema ne'e. Tanba ne'e, festa han-hemu, ba Jezús, mak símbolu apropiadu ida ba "Reinu" fraternidade nian, komuñau nian, domin nian lahó limite, ne'ebé Nia mai propoin ba ema sira (Mt 22,1-14; kf Mt 8,11-12). Jezús hakarak hatudu ho jestu ne'e, ho modu klaru katak, Nia mai apresenta proposta salvasaun nian ba ema hotu, lahó exesaun; no iha mundu foun ne'e, mane no fetu hotu (independentemente husi sira-nia hilin ka sira-nia desizaun laloos) hetan fatin. Kondisaun ida mesak atu tur iha meza "Reinu" nian mak dispostu atu aseita proposta ne'ebé Jezús halo.

Farizeu sira la komprende buat ne'e. Jezús fó hanoin ba sira katak "la'ós ema isin di'ak mak presiza doutór, maibé ema moras sira" (vers. 12); no temi profeta Oseias nia fraze ne'ebé ita hetan iha primeira leitura: "ha'u hakarak mizerikórdia liufali sakrifísiu" (vers. 13). Iha Jezús nia afirmasaun iha ironia ida: farizeu sira hanoin sira ema justu no di'ak, tanba sira kumpri Lei; maibé, iha Maromak nia perspetiva, "ema justu sira" la'ós sira ne'ebé kontente ho an rasik no moris izoladu iha auto-sufisiénsia rasik, maibé sira mak ema hotu ne'ebé tan la kontente ho sira-nia situasaun triste, sira dispostu atu simu Maromak nia don no adere ba ninia proposta salvasaun nian.

Ba Maromak, buat ne'ebé desizivu la'ós kumpri didi'ak regra sira, lei sira no hahalok sira kultu nian; ba Maromak, buat ne'ebé desizivu mak dispostu atu simu proposta salvasaun ne'ebé Nia halo no saran an iha ninia liman ho konfiansa. Ema hotu ne'ebé iha haraik-an no dependénsia, hela iha atitude ida-ne'e bele integra an iha komundade "Reinu" nian no halo parte ba Jezús nia komundade, ba komundade salvasaun nian.